



乾隆壬辰重梓

玉憲遺稿

拜經樓正本

題辭

吾家南有名亞左芬才同道韞八齡成誦蚤
通黃絹之辭十五能文雅擅蘭臺之札春樹
獻頌秋菊留銘固足扇林下之清風踵庭前
之麗則者矣况乃秦嘉徐淋之綢繆伯鸞孟
光之燕好花窺鏡裏本是同心魚托書中果
然比目既而東西南北夫子之蹤跡長遙風
雨鷄鳴深閨之歲時偏永溯錦江之眇眇織
並迴文望秦樹之盤盤情周四角殘月如初



月玉關之雁孤飛新秋似舊秋金城之楊半
落是以玉女窗開頻移柔翰秦樓鳳引迸入
清歌花管將翡翠為床香函倚珊瑚作軸倍
多贈荅彌切留連余也浦柳前衰渚蒲蚤落
稱詩說禮殊媿班姑聽曲知心頗憐白嫗方
期歸軒蘅薄春風拾翠山頭返櫂蘭汀秋月
采菱溪畔爾乃遽辭華表忽去玉臺撫雄劍
而孤鳴對悲鸞之獨影迹餘翰墨安仁所以
悲妻流覽篇章太冲因而愛女方斯為近痛

如之何茲以瓊瑤在御黎棗載陳嬌女惠芳
手訂魯魚之誤羣兒玉樹親承柳絮之吟望
珠玉之後輝忝秕糠之前導倘異日者魂歸
月下墨香拂夜火以如迎鶴返松間筆彩散
行雲而弗去

時

康熙辛亥中和月花朝是菴李因題於竹笑

軒

行畧

細君宜系出南陽葛氏明己郊孝廉臞菴公
女吳孺人所生第三女也甫二年伯母曹孺
人愛之撫為己女亦承明經亞韓公意繼父
母顧復之恩等于己出自是以長竟不知本
生之所自矣癸未八月十有八日侍曹孺人
觀潮海濱時吾母亦挈余至俱憇龍王祠下
二母並有佳兒佳婦之目遂締姻好余年十
有一細君方八齡耳越歲天步維艱化離寤

歎余侍二大人歸桃源故里外舅亞韓公亦
携家僑居相隔百武時盜賊蜂起晝夜竄越
荒榛斷礫中二母交相看視正同昨日事乙
酉賊稍平細君歸邑居明年余侍大人走越
國者二年戊子奉大人命歸起居外舅於玉
樹堂時外舅孺人之愛余正如吾母之愛細
君也已丑十月始就甥館婚禮成因知細君
狀細君幼而警敏長而省靜遇事明曉處之
不煩能達觀寡營儉于處已不為私藏焉一

切米鹽碎務更未數數然也如女紅鍼紵之
事即為之極其工都無屑意初八歲授女小
學及明心寶鑑纔半年避亂中止輒能明其
大義方余之館于葛氏也適披覽明詩細君
每質所疑見頗了了一日別母于歸題詩云
深閨一夜別小女十年情余見而異之因日
事吟咏無輟亞韓公正色曰女子無非無儀
奈何留心風雅細君遂焚其藁不復作無何
讀彤管遺編慨然曰班姑謝女後先掩映豈

遽不如男子耶更從事焉每至夜分不少間
初慕家靜庵之為詩自稱靜媛既而曰婦以
德向因自名曰宜字南有大抵自述其宥往
專一之思畧仿周南所有是謂詩志亦見泚
慎之概云憶自庚寅來歸我室其事姑也一
如其事母其為婦也一如其為女吾母喜且
不勝曰余得婦矣辛卯曹孺人不祿細君哀
毀幾不欲生遺簪隋履絕不顧而問焉親嘗
尤憂憂乎難之越癸巳初夏蛇噬之禍作嗚

呼此今日死之所繇基乎蓋蛇之所傷僅在
一指而毒氣所中竟至絕粒于是有以艸藥
進者故方取艸汁升許加酒一升同飲其如
細君量不勝勺僅取艸汁飲之蛇毒稍解而
寒痰盛作矣不一月而痰厥死而復蘇者三
四治之經年良已庚子病復作幾不起嗣是
漸覺神氣索索骨立支床雖花晨月夕足跡
不能窺園也余每有行即牽衣垂涕嘗若不
保其生歲丙午大人宦蜀六載余將趨庭輒

恐傷其意而未言也細君固心知之為俛首
曰行哉行哉奈何以妾身故致缺君定省懽
臨行絕無離別可憐之色戊申余奉大人歸
自萬里未數月而疾亟自分必死已而復蘇
庚戌歲始親家政一切米鹽零雜靜治而已
暇則手輯曹大家女誡七篇以訓女芬夕則
羣兒入閨定省各令之賦詩言志笑語宵分
不輟余方開顏久之九月先壟不戒理于官
留會城者久細君忽病痿絕不一介相聞且

囑兒輩曰不共之討期在必克勿以余病分
其心及余歸而病且不救猶談笑相慰勞謂
死生有命焉能相強其達觀也如此一夕夢
中忽朗吟而起余亦驚寤得蕭蕭木葉送殘
秋之句以為不祥遂命肩輿邀本生母吳孺
人及諸弟子崧子嶠話別命兒輩並繞膝前
女芬坐之床側載笑載言陽陽如平嘗既而
吾母至以手加額曰吾姑大人行輒以相累
此外一語不及于亂蓋辛亥正月二十有三

日丑初也奄然就逝嗚呼痛哉自結褵以來二十三年耳而病居其十九燕爾之懽無幾孤鸞掩耀命也何如雖然死生之際亦大矣薤露何悲朝華何幸第以是藐諸孤昏嫁未畢而竟委其事于耆耄之高堂是余所痛心疾首淚盡而繼之以血者也音徽往矣遺編尚存可不死矣夫細君生子三女一子冲壬辰生娶裴氏子溥甲午生聘陳氏子洵乙未生聘祝氏女芬庚子生未字悲痛之餘命兒

輩搜錄遺藁粗為詮次并志其行畧云時

康熙歲在重光大淵獻日在營室下浣日觀

山人朱爾邁記

玉窗遺稿

東海葛 宜南有著

古體 二十二首

擬古呈家日觀 二首

東南有奇鳥不食野田穀毛羽生光輝獨上
梧桐宿 闕

二

迴車駕言遠迢迢適長道四望鬱蒼蒼秋風
吹百艸上山山高涉江江浩浩萬物各有

時應須置身早

古詩

初日當窗牖盈盈樓上婦朱顏若桃李寶釵
耀螭首自言十五餘同心備箕帚山川一何
遠別離日以久春風陌上來吹我簷前柳

寄日觀讀書靈鷲

明月夜何皎獨炤離人思憶別若為情悲歌
空自知春風吹客帳山館鳥聲遲百里烽烟
隔何時共賦詩

怨詩

雲山阻且長遠望鬱蒼蒼浮雲掩白日念子
悽以傷行者不顧返春秋歲云晚

明月炤高樓

明月炤高樓皎皎多光輝上有蕩子婦凭高
獨徘徊徘徊復何如灑淚沾裳衣思君不能
語忽忽如周譏朔風吹庭樹賤妾將何依願
作高山鳥飛向君懷棲君懷不我顧鳴聲悲
以悽四海抑何曠分飛東復西

凜凜歲云暮

凜凜歲云暮雪花吹不住念子去不歸徘徊
頓中路夢裏見君還恍惚携君手哀樂難具
陳但言別離久喔喔晨鷄鳴日出當窗牖

遊禺園

駕言禺園遊流水一河長芙蓉花爛熳吹氣
溢金塘林高殘暑退宿雨動微涼浮魚躍曲
渚新燕來雕梁物理固有托人胡獨憂傷

長相思 二首

長相思
淚潛潛芙蓉落盡凋秋蘭深深水高
高山鴻雁那能度鯉魚空復還對鏡不敢照
橫琴欲罷彈

二

長相思
悵別離月上梧桐夜色遲秋風起白
雲飛有客長作客曰歸竟不歸音書久斷絕
羽翼長差池

去年

去年花似今年好今年人似去年老始知顏

色不如花行樂年年須及早

長短句

晝苦短夜苦長人如流水晝夜茫茫春風能
幾日歎忽委秋霜不如為樂及時莫懷千歲
憂傷世上浮生何足計飲酒花間花正香

燕歌行

別日苦促會日稀雲山阻隔雁飛飛懷君永
夜漫漫其憔悴蘭房悵別離妾只含情獨掩
扉君留他鄉胡不歸欲語不語還低眉撫琴

一彈心傷悲再彈不覺淚連絲明月爛爛無
光輝牛女咫尺河間之斗轉參橫夜半時

歌

夏火南遷兮卉木腓珠簾晝捲兮紫燕飛懷
遠人兮胡不歸

自君之出矣八首

自君之出矣明月炤羅裳思君如江水萬里
正茫茫

二

自君之出矣鳴琴欲罷彈思君如明月清光
獨夜看

三

自君之出矣蘭房久寂寥思君如楊柳短葉
復長條

四

自君之出矣不復理紅妝思君如秋露夜夜
不成霜

五

自君之出矣悠悠傷我心思君如松柏青青
植中林

六

自君之出矣春流空泱泱思君如逆水咫尺
不能上

七

自君之出矣空復艸青青思君如長醉千日
無時醒

八

自君之出矣日月馳奔駛思君如亂絲頭緒
不勝理

五言近體 二十八首

和女伴曉妝之作

春日麗東城春風動早晴鳥啼朱戶暖花影
綠窗明把鏡調蟬薄扶簪引蝶輕遙知臨浦
去羅襪有塵生

別母 二首

莫聽寒鳥叫夜雨豈堪聞不盡離堂淚無端

此地分樓高長窳好葉落故紛紛掩涕非無
語依幃戀白雲

二

不盡城南路悽然送行深閨一夜別小女
十年情露下兼秋迴天高聞雁鳴離愁空黯
黯寒月為誰明

寄陳氏妹

揮手驚雲散春風幾度思臨花知巧笑對月
想蛾眉遠道書難寄閑窗夢獨遲何年歸故

苑晨夕共題詩

憶昔二首

亂後難為憶飄零一夢中骨埋爨火斷戈枕
客途窮花落孤城在鶯啼故苑空此身真若
寄不止歎飛蓬

二

十年征戰苦况乃又徵兵雲暗旌旗動天清
鼓角鳴旄頭高不落江水咽無聲何日烽烟
靜歸農春盡耕

昭君怨

疋馬辭金闕衝寒拂玉鞭蛾眉邊月苦翠袖
朔風單書斷還窺雁愁深罷撥絃誰言明鏡
裏猶是漢宮年

宮辭

春色明丹殿飛花繞翠樓歌憐團扇薄舞逐
彩雲留笑語林間出尊壘月下浮離宮三十
六處處夜行遊

和日觀止溪雜咏二首

十畝成高志三春足勝遊籬深容鹿臥墻圯
任雲留岼柳藏書屋溪花失釣舟不須嫌寂
寞吾道合滄州

二

谷口逃名處何如鄭子真種松曾買地養竹
為投綸歲月杯中盡琴書枕上親鹿車應共
挽持此謝風塵

海上作

秋晚潮宜壯西風復怒生氣連秦駐白水落

赭圻明網集魚成市霞翻蜃結城求仙何必
遠即此是蓬瀛

送日觀行止溪

渺渺橫塘路嗟君去不禁花前看倚杖月下
足高吟揮手一尊別相思五柳深素書何日
寄空復竚佳音

即事

無那經旬雨樓高敞夕陰病餘憐把鏡愁絕
耐長吟芳樹春歸晚閑花鳥宿深蕭條看不

盡一寄白雲心

送日觀讀書止溪 四首

為厭風塵色遂君丘壑心不嫌道路遠却恨
別離深明月開新苑春雲隔故林有詩頻寄
讀莫漫滯清音

二

聞說清谿畔春風好荷鋤鳥聲遲客屐藤蔭
空床書故國山川在忘年草木餘相思新月
上渺渺獨愁余

三

結廬何必遠一徑入橫塘郊屋春雲重溪亭
白日長門閑芳艸色醉倚落梅香堪笑棲棲
者謀時愧稻梁

四

止溪處處好春到勝情賒芳艸深三徑橫塘
隱一家鶯啼連日雨犬吠隔籬花自有幽居
興行將挽鹿車

雨泊臯亭山

雨色分高岬，臯亭作客年。
宿雲封野店，微火辨漁船。
對酒山長暝，題詩人未眠。
空嗟前路遠，處處接烽烟。

西湖獨眺

春寒旅思永，湖上獨經過。
夜月分津樹，溪風逐棹歌。
輕囊憐客久，薄酒憎愁多。
不見西施在，蘋花漾綠羅。

靈鷲山庄和查甥叔寶

高山雲漠漠，雙澗水濛濛。
石逼迴人徑，松寒

出梵宮。開園金谷後，引興辟疆同。
便欲追高隱，投閑丘壑中。

嵩園納涼

六月當徂暑，尋幽到竹堂。
雲含薜荔影，風引芰荷香。
翠榭凌晨敞，金波溢夜涼。
從茲塵事隔，身世兩相忘。

早春閑居懷日觀止溪草堂

南樓曉色敞，捲幔入新春。
積雪晴依樹，疎梅寒傍人。
整書將理蠹，拂塵為驅塵。
料得橫塘

曲鶯啼花滿津

同查氏姊張氏妹遊棄家園園一名野

鶴林

小築成高隱幽尋一叩關水亭涵白日艸閣
臥青山家棄尊仍在林深鶴未還誰言武陵
隔今已出人間

九日懷遠

此日金陵客登高何處臺江寒鴻雁下霜老
菊花開書札人千里風塵酒一杯莫因青艸

歇不遣馬蹄回

送日觀蜀遊

蠶叢天地險劍閣古今愁揮手從茲別難為
芳草秋猿啼三峽樹月掛九江流不盡憑高
目西風獨倚樓

遙題南湖鶴洲

聞說南洲畔亭開一艸廬春生花歷亂風倚
竹蕭疎高閣招晨鶴清溪聽夜漁陶潛興不
淺五柳賦歸歟

有懷

別館人高臥終朝獨自愁大都征鳥下只是
白雲留夜靜寒花落庭空芳艸秋此心嘗百
折日夜水東流

懷日觀留蜀

北風吹萬里歲晚客衣單可惜吳雲隔長歌
蜀道難烏啼知閣近雁影寄書寒只有天邊
月清光兩地看

九日

九月復九日今年似去年

闕

寄遠

烟橫京口聞雨斷石頭城

闕

靈鷲晚眺

高峰望不極木落萬山空古洞藏仙跡晴雲
倚梵宮

闕

七言近體

一十四首

西山同日觀遊包氏廢園

山深地僻少經過宛宛柴荆出澗阿不盡泉

聲流日月無端雨色掛藤蘿亭開藜桂留人
住徑入蒼松舞鶴多即此投閑應勝絕庶門
偕隱定如何

湖上聽雨

一簾風雨送春殘徙倚樓頭興未闌落落野
鷗窺別浦依依檣燕語回灘高低樹色連天
暮遠近湖光入座寒為憶故園花放早此時
飛遍玉闌干

送日觀遊越

江花江草映江明孤客孤舟江上行不覺鄉
心吳苑隔無邊妾夢越潮平拂衣幾臥千巖
月把酒還尋萬樹鶯倘到鏡湖憑遠望綠蘋
處處是歸程

日觀燕趙之行贈別

露白天高秋氣清扁舟別浦動離情塞鴻雙
度重關曉江月孤懸萬里明為見彩毫飛鳳
闕可無錦字落瑤京樓頭應計歸來日莫久
焉支山下行

臥病懷遠兼示兒冲溥洵及女芬

臥病經年春復過畫樓寂寞竟如何山桃雨
後花爭放溪柳晴邊葉故多嬌女臨窗鋪薄
繒癡兒弄筆譜新歌東風日日吹愁去飛度
關前白玉河

寒食雨後時日觀客金陵

雨餘懷客舊長安正值清明旅食寒溪上綠
楊低拂水樓邊紅杏欲凭闌鄉心應逐烏衣
燕閨夢徒懸玉鏡鸞計日城南芳艸路馬蹄

歸共踏青看

得日觀九江家報

湓浦風高歸雁鳴素書天半寄君情最憐別
路秋聲急不似高樓月色明僕病連年虛點
藥時危幾得罷徵兵遙知江上琵琶怨濕却
青衫夢未成

懷日觀蜀中

秋林閑坐日蕭條萬里橋邊書信遙鴻雁一
聲驚落木霜華八月試寒袍蓬萊水淺迷歸

棹灩澦堆沉擁去潮料得詩成應念我東吳
西蜀共揮毫

梅花

歲閨春寒花故遲墻東先放兩三枝不傳庾
嶺仙人跡誰繼揚州水部詩白雪臨風飄玉
笛銀梭永夜度冰絲深閨豈問王家臘領得
孤芳此一時

憶遠

北窗雨過晚涼宜綺閣秋深獨坐時已被食

風吹袖薄不堪壁月度霜遲雙魚江濶書難
寄疋馬途寒人後期憶得清詩題滿篋白雲
滄海共相思

咏雪寄李是菴太夫人

朔風昨夜度江城六尺飛花點鬢輕自是子
猷應盡興獨慙道韞舊知名關河臘盡連梅
放野戍寒深帶月明寄語吾家庭樹下清尊
莫惜酒頻傾

送兒輩還小桃源故里

扁舟東道一追攀
堂構應知祖業艱
爾去似憐青艸遍
余行猶記白雲閒
臨風花發仙源雨
入座春浮滄海山
隣老不知誰獨在
相携尊酒共盤桓

別子嶠弟溯錢江而南

春深芳艸亂紛紛
絲管當筵更別君
雨外烽烟迷海瘴
尊前悲喜入江雲
路經故國山川遠
夢隔寒塘笑語分
愧道鵲鴿情漫
歸與共論文

懷先母曹太夫人

望望慈闈黯自傷
仙遊何處白雲鄉
蓮花枉說生西土
護艸徒然樹北堂
對雪幾年爭咏絮
看花一日罷飛觴
長天只有哀鴻影
一片雲箋寫斷腸

闕文

暮春天氣楊花飛
片片吹來點客衣
桃花灼灼流鶯轉
楊柳垂垂乳燕飛
珠曾不夜愁偏夜
艸自當歸人未歸
蕭蕭木葉送殘

秋

四言一首

閑居

清風滿徑綠樹重陰數聲啼鳥庭院深深

五言絕句 六十一首

和家日觀村居 五首

家住橫塘曲門開槿作籬春寒一夜雨溪上
落花時

二

門掩垂楊綠春風散深谷撫琴一再彈月照

幽人屋

三

日暮映朱霞泉清流玉砂溪邊人不見犬臥

一籬花

四

寂寞南村屋幽人獨著書林花開幕雨春水
漲溪魚

五

梅放山村白鶯啼二月初妾心增歷亂君子
近何如

送家大人往武林

日落秋光晚依然獨自行乳禽啼外苑無數
別離情

湖上

秋晚芙蓉好人歸古渡頭相看不相識多少
釣魚舟

西湖題鄂王墳四首

寂寞兩湖雲扁舟過岳墳南枝長向日猶似
欲云云

二

山色春仍綠深松古墓存不堪頻極目半壁
舊乾坤

三

青山埋骨處白日澹松梢獨有年年恨愁雲
鬱未消

四

千載留名姓空山遺像尊至今荒亂後誰與
薦芳蓀

山居集唐

山館長寂寂孤雲自往來芳艸本無意尋幽
石徑迴

贈別集唐 二首

此別又萬里勸君金屈卮寸心言不盡是妾
斷腸時

二

送別強為歡猶嗟行路難遙憐北窗月閨中
祇獨看

九日

黃菊蕭疎放重陽風雨哀登高何處是白雁
故飛來

北風

北風吹蕭颯遊子衣裳寒相思何日見一話
別離難

送日觀赴止溪 二首

惆悵春風晚君胡此獨行應憐堤上柳日日
向愁生

二

芳艸離亭暮相思兩地深願隨明月影流炤
止溪陰

日落

日落秋山迥天邊鴻雁來相思無一字獨立
幾徘徊

口占

明月上闌干春風散夜寒愁人不能寐永夜
起盤桓

春日懷申夫人詩農移家洞庭 二首

小閣垂楊裏春風彈玉琴懷人何處是一寄
白雲心

二

曉日窺羅帳新花點綠窗洞庭春渺渺幽興
未能忘

九月

九月黃花放三秋白雁來
懷人空悵望尊酒
獨登臺

對月

明月何心到
沉吟此病軀
空庭雲木靜
猶帶玉顏臞

除夕

高閣寒猶淺
重城氣自新
梅花開舊臘
栢葉動芳春

咏昭君

自憐傾國色
無賂屬丹青
漢室方全盛
蛾眉辭掖庭

咏班婕妤

聞道昭陽宴
承恩樂未央
應憐妾薄命
不復試羅裳

古意 四首

美人浣紗處
獨與清波閑
明月出波上
光輝映玉顏

二

美人隔南浦縹緲若雲端相望不相語迢迢
一水間

三

美人臨高閣春光炤綺羅含情獨不語想是
為愁多

四

美人家南山終日閑無事惟有幽谷蘭領得
閑中意

偶成

溪柳垂垂綠山雲漠漠深幽人閑把釣身外
寄浮沉

春雨

春雨暗窗紗春風散落花春妝猶未了春去
遍天涯

溪上

採花溪上女朱顏耀桃李桃李有時凋朱顏
長如此

閑居

春來盡日雨門外少經過惟有鶯無事閑啼
到綠蘿

深閨

深閨獨自坐楊柳正依依記得春來別春歸
人未歸

獨坐

夏雨初消暑涼風動翠微幽然閑獨坐只有
暮雲歸

留別

此去經年別來時未早秋為言庭下樹花發
待歸舟

即事

竹塢秋聲早蕉林雨氣遲懷人江上雁肯為
寄相思

促織

促織聲何促愁人聽更愁秋風吹不散寂寞
小窗幽

秋月

秋月澄如練霜飛客路中臨行執君手猶憶
話匆匆

偶成

閑步涉幽異行行雲路迷樹深人不見黃菊
小橋西

懷遠二首

鴻雁南飛急蕙葭江上寒懷君值秋半永夜
月團團

二

明月映疎簾秋風羅袖寒夜深飛夢處曾不
到長安

送日觀之川南四首

昔遊當薊北今去復川南竚爾歸來蚤臨岐
語再三

二

執手情難已長江萬里遙北風吹不散日夜
逐寒潮

三

欲別難為別思君更恨君猿啼萬里隔愁絕
不堪聞

四

客路青天上應知蜀道難孤舟將遠水相送
各漫漫

咏籠中鳥

樊籠山雀苦難啄道旁禾寄語深林鳥飛飛
避網羅

秋

園林蕪寂靜野興獨幽然露冷芙蓉濕霜清
鴻雁還

有懷

明月秋如練長天雁獨還閨中書已就猶未
寄君前

集唐十首

乘興入幽棲故人具鷄黍別自有仙家心期
悵以阻

二

宿雨朝來歇煩襟四座清高高翠微裏江樹
遠含情

三

竹裏尋幽徑千峰不閉門悠然策藜杖曉日
散鷄豚

四

松聲靜夜聞涼月白紛紛門徑稀人跡空山
獨見君

五

曲巷幽人宅穿林自種茶秋風一夜至衝落
半巖花

六

滄浪有釣舟長嘯且乘流前路逢漁父烟波
處處愁

七

寂寞坐遙夜春風與閉門悠然無一事夜雨
長溪痕

八

去住雲無意悲涼物已秋天清一雁遠宇宙
此生浮

九

雨餘清夏晚共坐北巖幽翛然靜者事山空
水碧流

十

平生愛山水卜宅近前峰無數烟霞色相期
谷口逢

中秋月下

月色明如晝清光動綺窗

闕

六言絕句

五首

閒居

四首

郊屋數間村北林花幾樹溪西遠浦不聞人
語隔離惟有鶯啼

二

曾占沙鷗癡癖真同海鶴閑情素琴一曲月
上紅蕉滿院風清

三

門開垂柳春綠石倚長松徑深對月閑評詩
句看雲漫步溪林

四

竹塢蒼蒼雲臥蓮塘曲曲鷗眠惟有女伴三
四不妨酒債十千

九日

九月九日佳節一丘一壑閑居鴻雁天邊嘹
唳黃花籬下蕭疎

七言絕句 五十六首

春遊曲和李是菴太夫人

飛花簾外暮春時日暖朱樓映翠眉南陌紛
紛踏花去紫騮嘶處綠楊垂

送日觀之金陵

送客金陵極望中江流無恙片帆風應知歌
舞秦淮月不與高樓夢裏同

咏西施 三首

浣紗溪在苧羅西綠水紅顏溪上迷一自吳
宮歌舞散可憐芳艸尚萋萋

二

響牒廊前月正明
姑蘇臺畔鷓鴣聲
興亡獨有鷓鴣恨
江上寒潮迥不平

三

曾道親陪御輦行
宮中醉舞綠羅輕
一朝國破扁舟去
剝得春風江水清

咏王昭君

羶裘毳幕玉門關
馬上琵琶帶淚彈
顏色可憐君不見
空留青塚在人間

咏班婕妤

長信宮中月如練
昭陽殿裏雙飛燕
可憐對月獨思君
月下空床君不見

坐月

獨坐高樓夜色沉
半窗明月到深深
却嗤秦女曾多事
漫自吹簫學鳳吟

月下有懷 二首

梧桐月落夜闌時
萬里清光兩地思
鴻雁一聲秋色裏
懷君客路益淒其

二
初月纖纖映竹扉
秋風蕭瑟動羅衣
不堪羌管橫吹處
一夜霜天葉亂飛

即事

百花洲上雨聲涼
新燕初飛濕畫梁
獨坐不知春色晚
落花風送滿庭香

閒居

落盡梅花春去初
半窗修竹影扶疎
閒居惟有書千卷
獨對青燈夜色虛

咏十姊妹花

歷亂紅裙風漾開
上林春色日邊來
趙家姊妹誰相似
偏向昭陽殿裏栽

咏罌粟花

流鶯啼盡黃鸝鳴
罌粟花開炤眼明
莫道東風漫搖落
一朝顏色自傾城

咏虞美人花

翠袖風前漾綺羅
朱顏月下斂雙蛾
最憐永夜閑風月
尚似低徊喚奈何

咏剪春羅花

楚館吳宮春未闌
細腰爭舞綠羅寒
人間那得并州剪
剪取風情雨後看

春日二首

春深芳艸綠萋萋
暮雨紗窗鶯亂啼
無那新來人獨病
滿床藥裹不勝題

二

簾外新晴歸鷺遲
懷君遠道欲何之
江天春色看如許
辜負垂楊欲暮時

秋夜

銀床金井碧梧涼
月下題詩秋夜長
更有幽情吹鳳管
不知何處是秋霜

芳樹

庭前芳樹影參差
春暖鶯啼爭上枝
開落不堪人事改
青松獨與歲寒期

哀江南婦

五月新蒲葉正齊
清江極目遠萋萋
何堪多難傷心切
一曲箜篌揚子西

雪窗感舊

千山積雪鳥聲稀
玉樹堂前花亂飛
對酒不堪頻說舊
詩成柳絮好瞻闈

深閨

深閨乍見柳條新
折得枝枝空復春
無限愁思題不盡
暖鶯聲裏望歸人

病中喜日觀同子崧子嶠兩弟止溪看

梅二首

樹樹梅花溪路深
玉壺春酒怯登臨
羨君好

醉橫塘曲兩袖清風
苔素心

二

止溪遙望白雲深
況是梅開花滿林
想到題詩清絕處
春風吹亂病餘心

賦戍婦六首

月下寒衣手自裁
裁成窸窣向誰開
自憐不及孤鴻影
猶帶關山秋色來

二

雲羅霧縠不成妝
獨對孤燈引淚長
却恨當

年歌舞月偏來炤妾滿空床

三

愁來不復鬪芳春
春色空教飲翠顰
無奈昨年花下別
今年花落未歸人

四

自去從戎幾歲除
春風日日夢魂疎
殷勤囑付新來燕
肯寄征夫萬里書

五

玉壺春酒上高樓
豈解春來無數愁
別恨總

隨明月往清光
猶得炤邊州

六

春風愁思兩堪憐
愁思看春春易闌
况是昨宵愁夢裏
相傳郎在暮春還

贈別

青青楊柳動離愁
君子當筵賦遠遊
囑付雙魚頻寄訊
月明花下聽歸舟

春感 二首

二月梅花落似雪
三春楊柳亂如絲
那堪花

柳添愁思寄與東風總不知

二

寂寞村居水一涯半間茆屋傍溪斜亦知昨日復今日閒數開花與落花

題木芍藥

疑是新從雒下來一枝濃豔倚妝臺應憐凡卉經春盡獨爾天香最後開

寄金陵

六代興亡感慨同長堤楊柳片帆風還裁尺

素憑雙鯉寄到秦淮江水中

送日觀之京

暮春疋馬向長安處處垂楊客路看一望雲山千萬里相思何日賦刀鐮

寄北

芍藥花開送自吳秋風又復採茱萸高樓數遍南歸雁雁到江南書到無

幽齋

幽齋寂寞坐啣杯一徑烟花逐雨開可奈歸

鴻愁裏聽雲山萬里影徘徊

西湖寓目

十里西湖曉霞開桃花夾岸春風催客子行
行獨惆悵流鶯啼遍畫船回

午日自題

吾年三十復添五終日臥病當端午只今且
補忘憂艸富貴浮雲何足數

凭樓

天涯飛夢幾含情獨夜凭樓數去程月下空

庭秋似水一行歸雁客愁并

九日懷遠

秋雨秋風強上臺一尊濁酒漫徘徊遙知此
日龍山客醉裏黃花笑獨開

擬宮詞

露冷芙蓉夜色清遙聞別院管絃聲何人獨
擅昭陽寵明月先生翠袖輕

集唐

雲水蒼茫月向西開簾只有艸萋萋紅顏豈

得長依舊春半如愁意轉迷

春宮詞集唐 五首

珠簾繡戶對春風天樂遙聞在碧空細州偏
承迴輦處年年先發館娃宮

二

君恩如水向東流深鎖春光一院愁鳳輦不
來春欲盡任他明月下西樓

三

春風日日閉長門金屋無人見淚痕却恨含

情掩秋扇月明花落又黃昏

四

紗窗日落漸黃昏侍女移燈掩殿門清禁漏
閑烟樹窳不如桃李自無言

五

黃鳥翩翩楊柳垂館娃宮暖日斜時曾緣玉
貌君王寵春色人間總未知

秋宮詞集唐 二首

金井梧桐秋葉黃月明歌吹在昭陽淚痕不

與君恩斷共滴長門一夜長

二

奉帚平明金殿開遙聞笑語自天來閑看秋水心無事肯信愁腸日九迴

荅申夫人詩農見貽之作用原韻

四首

傳說幽人近卜居洞庭春水繞篁廬千峰月落見長嘯一徑花開聞讀書

二

何幸溪頭雙鯉魚遙傳新句到吾廬驚來雲

漢天孫錦留作青山宛委書

三

硯池託興近何如筆底花生飛滿廬知爾前身元姓衛曾傳高弟右軍書

四

臙脂溪水靜涵虛流近香溪溪上廬擬向花源信棹遠不須青鳥更傳書

詩餘 一十三首

無題 十六字令

月映綺羅寒愁倚欄佳人怨相思隔萬山

春暮 三字令

春欲去海棠時正相思珠簾捲寄書遲君不見
愁脈脈妾心知空悵望負佳期雙燕棲
香泥蘸畫梁低燈黯澹雨迷離夢回初

和日觀并寄 轉應曲

歸燕歸燕飛到畫梁深院肯寄相思玉人楊
柳依依望春春望春望春望杜宇聲聲江上

懷遠 南鄉子

春澹澹柳依依黃鸝聲裏落花時暮雨紗窗
人寐莫愁無托萬里相思重疊疊

納涼晚坐 荷葉杯

微雨初消殘暑正及晚涼時荷芰一池相映
綠風起亂鷗鷁

午日 江城子

五日筵開亭午時泛金卮詠新詩艸自忘憂
虛牽續命絲獨有三閭湘水濶流不盡古今
悲

寄書 踏莎行

花撲珠簾雲生烟樹倚樓望斷人歸路却憐
一夜雨和風落紅滿地吹無數 新燕初飛
鷓鴣拂羽有客行行千萬里欲寄尺書江水
深春來春去傷心處

懷遠 長相思

雨聲響雨聲沉雨漲溪頭溪水深情牽綠柳
陰 春色寒春夜闌靜倚東風不忍看一天
雁影還

送別 春光好

梅葉放桃花明正啼鶯無奈扁舟君欲行幾
含情 愁深不日不月春寒乍雨乍晴南北
東西芳艸路忍青青

春仲 仲興樂

鶯啼朝雨畫閣人初起簾外桃花嬌欲語正
及清明時矣 含愁靜掩金閨開奩獨整羅
衣漫舉姍姍翠袖臨風好待君歸

春半 憶秦娥

風雨散玉人隱隱垂楊畔垂楊畔聲聲杜宇
春歸將半溪頭桃李花正爛多少閑愁無
心看無心看腹裏車輪輾轉不斷

春感 虞美人

春來春去當春仲舊事如春夢無情綠柳繫
相思不盡江頭流水去遲遲 吳宮楚館今
誰在歎息年華改一朝風雨暗芳洲白日光
如何處 昭重樓

同查氏弟張氏妹止溪春遊 臨江仙

雨過芳洲春風暮漸看芍藥花稠姊妹相携
泛小舟一天晴日燕滿徑亂香浮 芭蕉古
街竹林幽止溪溪水悠悠烹茶煮笋任淹留
便是桃源路追隨愜勝遊

書 二首

寄日觀蜀中

一日不見如三秋今古人有言何況二百四
十日也雲山萬里跋涉崎嶇靜坐深閨思同
流水悠悠此心言之傷矣雖趨庭嬉綵君勺

承權而弓韞綸垂誰與為樂連年累歲病骨
堪憐異地同心夢懷不斷為寫短書之三寸
親付錦囊倘周盤中之四角馬蹄速返

荅申夫人詩農

宜白詩農夫人妝次重蒙損詩及書往復諷
詠有如覲面宜自慚下里缶蟲之吟無關風
義讀尊集洋洋灑灑如登泰山臨滄海昔人
有言聞雅樂而自放其音過西家而歸憎其
貌于今益信矣第念吾輩長自閨中無師友

之益講求之功徒屈首小窗間作蠹魚生活
雖幾食神仙之字滿腹而止何益之有宜是
以日抱簡編有生不見古人之憾夫人讀盡
賜書復得仙姝花邨諸閨友酬唱之樂固不
足以語此鄙人僻陋以知己之前聊述所懷
并附原韻詩四首呈正望有以進之母金玉
爾音幸甚幸甚

龍山朱日觀先生以詩受知于王
新城司寇故感蓋集中所收獨多
又嘗寄以詩云故人朱季在何處
駕飛鴻其婦葛南有氏亦工詞
翰所著玉窓遺稿康熙中曾刻
之小菴源未幾板復散去以是知
之者益少吾友朱秀才允遠日觀
族孫也尚居桃源故里歲庚寅屬
之蒐訪閱數月如獲以遺予為之

狂喜累日。蓋此稿浮沉于世者殆
及百年。非其後人寶守之。固有不
為廣陵散者歟。希曰。亟為讎校。
重付剞劂。凡南有生平大槩。具於
行略者。姑弗論。論其詩。雖天真
刻露。不及泚。真而纏綿。委致得
詩人敦厚溫柔之旨。似或過之。良
由所遭多不同耳。惜漢洋當日未
之一見。其知日觀得無於有未盡然。

文章顯晦。要自有時。一人之耳目心
奚能遍及海島。亦多形管。而又安
知是編而外。不更有清裁麗製。抱
痛于沒世。無聞者耶。闡幽微。顯
是在同志之君子而已。壬辰正月
吳騫跋

梅樂園存稿

Blank writing area with vertical lines.

梅花園存稿一卷鍾淑人肩令著淑人名韞
為鄉前輩逸遠查先生配悔餘太史母也本
仁和人祖忠惠公明萬歷中名臣著在史傳
淑人少嫻內則工詩及長短句與逸遠先生
唱隨偕老彷彿鹿門之風又能教其子以成
令器昔晉王渾妻鍾氏乃太傅繇曾孫通識
古今諸子竝擅才藻時稱鍾夫人之禮今觀
淑人詩澹遠饒有林下風韻以略才名崇學
術教其子何鍾氏女之多賢耶惟是太史當

日負文章重名為士林所宗仰而此稿未之
刊布以公藝苑何歟豈其恪守聖善之訓以
為著述非婦人事而弗欲出之抑亦知夫白
雪之詞幽蘭之調終不與曉風殘月同其銷
歇于天壤間歟予刻海昌閨媛詩因取付削
刷以存一家非遂謂足以盡淑人也乾隆壬
子仲夏吳騫識

梅花園存稿

仁和鍾韞眉令氏著

西溪山莊同胡少君方眉士積石引泉

壬午

曲塢藏茅屋層巒啼杜鵑雲木亘交蔽日午
窺中天山家饒生計梅竹當田園荷耒恣遊
宴投足生流連經冬長蔓草遶舍鳴寒泉澗
應石磊磊藻上魚蹠蹠同時得幽興引源及
堦軒鑿石初照月開徑夜生烟共傳山中叟

能說羲皇前歷世經長毓草木密繁烟生無
樵採患安知耕鑿年

西湖竹枝詞甲申

湖外春雲映晚潮湖頭簫鼓入春饒風光朝
暮知多少弱柳煙波十二橋

重過方氏山居

西溪山下路茅屋俯溪流又是經年別重來
此地游名花多映檻脩竹半遮樓未識人間
事耕桑已白頭

雨牕有懷和四姊韻辛卯

落葉紛紛晚未休屏山深處坐生愁空庭入
夜多風雨無那含情獨倚樓

初夏獨坐丙申

黯坐情驚恐愁來君不知螢光窺寂寞孤影
伴相思

得逸遠京口信丁酉

長風遠去好乘槎短札遙傳記歲華屋裏寒
梅三百樹年年偏看客中花

楊柳枝詞四首戊戌

花發蘓堤柳葉黃江南春色正微茫
杜鵑早夜啼還歌引恨絲絲爾許長
天邊消息幾人來望斷刀環情更猜
欲折柔條還欲擲昔年曾寄隴頭梅
昨日楊花泣路歧也經寶馬繫青絲
祇今甯巢聽應慣弱柳何曾管別離
展眼舒眉向水涯年年春色到山家
東風暮起鶯啼處飛盡枝頭楊白花

寄逸遠金陵

平原叢草竟何之早夜能無聽子規
野水自添桃葉渡東風重寄竹枝詞
人間騏驥誰能識天上星辰闇自移
建業朱張今在否鹿門歸計每棲遲

再懷逸遠金陵

年來幾度負中秋又入金陵何所求
小艇漫歸桃葉渡醉眠今夜那家樓
秋夜病中寄四姊巳亥

年來多病幾經秋
深院疎簾獨自愁
霜露滿天寒夜永
月明誰與共登樓

別西園

幾處繁陰散曉春
樓臺此去積埃塵
無心花下黃鸝鳥
宛轉居然戀主人

別西湖十載庚子春季重遊率成二絕

以志感

笙歌日暮繞湖濱
短棹重遊景物新
無限繁華看不見
六橋芳草自成春

春草春花春水舟
春風轉憶少年游
即看舊日題詩處
盡作連天牧馬愁

湖上却寄逸遠

二月風煙一倍新
生當離合見情真
西湖姊妹能忘歲
無奈龍山花下人

經博溪故居不無零落之感口占二絕
迷漫荒草晚鋪煙
花鳥無人亦可憐
羅綺樓臺今在否
沉吟猶記十年前

南樓歲月儘繁華
姊妹年年約看花
誰道桑

田成轉盼曉風殘月叫寒鴉

哭母詩集三百篇

南有樛木維鵲有巢乃生女子母氏劬勞
雖則劬勞不敢告勞恩斯勤斯以永今朝
女子有行婚姻之故豈伊異人遠父母兄弟
終鮮兄弟不遑將母我日斯邁載離寒暑
昔我往矣親結其襦帶則有餘髮則有旗
曷云其還不遂其媾子寧不來歸寧父母
我生之後喪亂宏多流離瑣尾傷如之何

喪亂既平爰居爰處籩豆既具和樂且孺
我有旨蓄以介眉壽黃髮兒齒靡屆靡究
云何吁矣有女此離宛其死矣歸於其居
人亦有言逝者其耄誰無父母我獨不卒
無母何恃女心傷悲懷哉懷哉誰將西歸

示兩兒讀書吳山

喪亂還家後周旋祇兩兒苦辛都為汝貧賤
且從師慎勿趨時好何須戀舊茨晨昏原細
故努力慰哀遲

晚春偶成

鶯啼紫陌柳依依三月和風燕盡歸正是春
愁消不得落花時近畫簾飛

答方眉士

山高無路見飛鴻故里流光烟雨中長夏穠
花看互發橫空明月感誰同西陵草木隨天
遠東海音書隔歲通聞道玉人多病後綺牕
斜日坐春風

秋夜寄懷八妹

相思長自恨相違幾度西風木葉飛鏡裏新
愁添白髮秋來多病怯羅衣夢回竹榻燈初
暗夜久空庭月較輝獨倚南牕不成寐花間
露氣已霏微

春早

東君昨夜入東家深院輕烟細柳斜淑氣冰
壺知暖否曉寒手爪更涼些香風尖側侵牕
隙春事逡巡到檻花綺閣有人驚物候鈎簾
小坐惜年華

西園木奴為冰雪凍死

斬草誅茅用意深
開花結子待成林
無端冰雪偏相妬
負却栽培老圃心

次女得子

我行初挹汝汝長
又生兒宅相非無種
寧馨卜可知爾曹催我老
班鬢逐年衰眼見諸孫滿
能忘繞膝時

喜方澹宜眉士同過

垂陽秋早好停船
喜鵲迎晨報獨先
一度韶

華憐好景暫時尊
酒惜流年倒傾海水深
情在落盡燈花細
語傳羨爾早無兒女累
不妨並老鹿門烟

再和眉士原韻

女兒攜畔接清溪
久別鶯花蔓草迷
書到幾曾看過鴈
夢回重與聽鳴鷄
相看此日頭俱白
轉憶當初髮未齊
與爾挑燈忘夜永
明朝歸路下塘西

採蓮曲

盈盈閨中女覆髮甫及肩家臨九江水目極
萬里船自憐秋思多結侶橫塘邊鄰女三五
人相將共採蓮江流渺無際明淨歛朝烟何
以蕩遥思翠袖迎風便何以媚新粧好花相
與妍並舟輕出沒來往還流連語笑有同心
攀折私自憐採藕斷其根絲絲猶自牽摘花
觸荷葉油珠不成圓

題瓶中杏花

紅杏爭開二月芳折來春色艷幽莊憑他零

落依簾幙勝却隨風委路傍

璉兒瑯兒分心吟咏恐荒章句詩以誠
之

頭顱俱長大負笈豈徒然家計愁中落成入
望汝賢才名終世態學業有家傳好副雙親
望辛勤二十年

哭方眉士并序

歲在辛亥予抱危疴自夏徂秋未離牀席
九月杪驚聞眉士訃信欲憑棺一哭困憊

不能也念此生知己惟眉士一人生離死
別地角天涯苟復有情何能遣此因伏枕
成悼亡十絕略叙其生平及吾兩人始終
相厚之誼真未足寫愁腸萬一也握管展
紙幾於無淚可揮矣眉士有靈尚其鑒諸
淚盡腸枯信有情獨留病骨強吞聲殘生從
此無知己魂魄君應待我行
少小追隨事唱酬年年花月自春秋夢中重
入西溪路何處逢君話舊游

死別生離敢怨天多情深自憶當年縱然經
歲纔相見還勝今朝隔九泉
去春姊妹過花溪深夜挑燈訴別離頻訂今
秋重會晤何堪一死永無期
自入名門敢暫違向人五十尚低眉最憐脉
脉泉臺路抱恨含淒只自知
衛女工書謝女詩吟花咏雪總相宜只今篋
底遺編在解意人稀好付誰
連理枝頭望不歸君家姊妹但相宜那知垂

老仍分翼何不當初各自飛
身後寧須戀子孫輕雲縹緲識精魂從他洒
盡千行淚涓滴何曾到九原
人說悲歡互有緣如君生死總淒然少年心
事中年病屈指虛生五十年
一點殘燈半榻塵難憑靈柩哭亡人知君回
首重泉下應恕天涯病廢身

方眉士以古琴見貽感其為永訣之物

拭淚寫此

念載幽閨裏追隨直到今不堪成寄贈從使
哭人琴玉柱彈珠淚哀絃負賞心鍾期知不
愧後死豈知音

病中值四姊忌辰

霜淒露冷黯傷神永訣前年是戊申今日可
憐重記起未已人哭既已人
地下人間一片心幽明長望永沾衿白頭老
母如相見小妹連年病亦深

秋夜獨坐懷夫子久客湖山

夜寒添半臂秋氣透牕紗孤榻齋中影殘燈
夢後花授衣時已晚望遠路偏賒却怪天涯
客經秋不憶家

春日懷逸遠

胭脂憔悴懶拈詩愁看雙鴛臨小池一樹梨
花吹未落東風綺閣斷腸時

詩餘

小重山寄翁少君

舊日春風過旅堂海棠初放處倚斜陽簾攏
手柱博山香思往事兩兩試紅妝揮手恨
添長胭脂憔悴後儘思量懷君尋夢轉迴廊
殘紅和淚落染羅裳

如夢令春暮

攬鏡朝來無緒簾外飛花如許林際子規鳴
又見荼蘼細雨春去春去欲問春歸何處

前調病起

抱病恹恹懶繡怯怯腰肢如柳睡起捲珠簾
恰恰鶯啼時候聲透聲透喚得深閨人瘦

天仙子送春

花飛頓覺韶光盡黃鸝相喚愁相應凭欄徙
倚不勝情推粧鏡穿花逐花枝憔悴疑同病
愁懷怕共東風競冉冉綠陰何驟盛園林
滿目但傷神春無剩畱難定琴絃慵整人初
靜

長相思贈畫上美女

丹青手誰人有能描一種丰姿否好是鴛鴦
侶顰眉久時低首深情應為春相負春也
難消受

前調遊園

針懶拈香懶添仲春天氣喜遊園相呼楊柳
邊愛春妍惜春妍一夜催殘風雨天飛花
滿畫簾

鷓鴣天寄九妹

一春愁蹙兩娥眉
花自芳妍人自悲
蛺蝶穿
渾似夢少年風味
杳難追
頻折柳試春衣
亂紅深處鳥爭啼
生憎呢喃雙燕子
飛來飛去共差池

鵲踏枝 贈鄰女

幼女性情天與慧
紅杏牕前愛把新妝試
怨粉愁香如有意
相思未解真滋味
露濕春
枝花更麗
半面含嬌的的爭明媚
深院垂楊
門畫閉
春風何限登樓思

重疊金 美人曉粧

雨聲一夜沾花足
柔枝低壓闌干曲
曉起薄
羅裳微微指甲涼
鏡中憔悴後粧點偏宜
瘦瘦到不堪時
猶然去畫眉

鵲踏枝 游園

眼見秋來秋已盡
紅蓼開殘秋也無
光景竹
外魚歌低自應
一溪落日平如鏡
薄暮輕
寒霜降近
鬪草籬邊翠色看猶嫩
怪煞主人
常抱病從教蕪穢
黃花徑

少年遊即事

東南日出照庭隅風景隔牕虛細草闌干輕
烟簾幙天氣困人初 夢魂一晌閒無緒擔
擱綉工夫慵整菱花怕聽鶯語心事尚糝糊

選佛詩傳

查羲

淑人精文選工詩古文詞所

著集百卷疾亟時自以風雅流傳非女士所
宜悉焚棄之伯祖初白老人默識詩詞追錄
六十餘首題曰梅花園存稿

岩門詩話

查岐昌

先淑人生鮮兄弟有女兄

字山容女弟字眉士針紵餘閒互相倡和曾
有長繡樓詩集若干卷追歸先贈公後值先
高祖武庫公捐館風搖草動百毒齊起先贈
公宏濟艱難推剛為柔重立門戶宿艾駭服

先淑入實相助之而危屯之歌鉛筑之聲惟
覓知音於閨閣一時比諸鹿門故事贈公詩
已畧見明詩綜淑人詩不下數十章迴憶岐
昌總角時大父舉先淑人詩示予兄弟曰才
名終世態學業有家傳此吾讀書栖水時曾
祖母寄示之句願汝曹亦無忘斯訓也嗟乎
門戶頽零箕裘欲墜溯尋家學深愧淵源援
筆為之憮然

敬題曾祖母鍾太淑人梅花園存稿後

錢塘鍾霽秀閨閣多風雅太君出名門家學

非苟且淑人為明中丞清惠公女孫憶歸先贈公唱隨宛

林下風月任吟評溪山入陶寫清詞本靜好

高調絕妖冶夫何遭遭迤迤慨此存焉寡豈無

臯魚血每向北堂灑開篋理殘編斷句敢或

捨淑人詩稿散佚伯祖初白桂林雖一枝幽

馨尚盈把堂敬業派淵源溯昔者伊余志

管彤懷古情無假予輯學繡樓名媛詩選淑人錄十之六七誦味

深長思更闌燭垂地

曾孫女昌鵷稿

深長思更闌燭垂地
曾孫女昌鵷稿

